

## ପିତରଙ୍କ ଲିଖିତ ପ୍ରଥମ ପତ୍ର ପାତ୍ରରାସ୍ ଅଲ୍ମାକାଦ୍ ପାହିଲା ଚିଟାଉ ପାରିଚାଏ

ପାତ୍ରରାସ୍‌ଆଃ ପାହିଲା ଚିଟାଉ ପ୍ରେରିତ୍ ପାତ୍ରରାସ୍ ହରାତେ ଅଲ୍ମାକାନା । ପାତ୍ରରାସ୍ ଅକଏ ତାନିଃ ଆତଃ ନେ ଚିଟାଉ ଅକଏତାଃ ଅଲ୍ମାକାଦାଏ, ନେ ବିଷାଏରେ କାଜିକେଦ୍‌ତେ ଚିଟାଉ ଅଲ୍ ଏଟେଦ୍‌କାଦାଏ । ଇନିଃ ନେ ଚିଟାଉରେ ବେଗାର୍ ଚିହ୍ନାର୍ ଖ୍ରୀଷ୍ଟିୟାନ୍ ହତ୍‌କକେ ଅଲ୍ମାକାଦ୍‌କଆ ୧:୧; ୧:୧୭; ୨:୧୧ । ଇନ୍‌କୁ ଅତେଦିଶ୍‌ମ୍‌ରେ ଛିତିବିତିକାନ୍ ହରାତେ ଇନିଃ ଆୟାଃ ପାତ୍ରାଅତାନ୍ ହତ୍‌କକେ ପୁରାଃସାଃ ନେ'ଲେକାଏ କାଜିକାଦ୍‌କଆ । ଚିଆଃତି ନେ ଚିଟାଉ ଏଫିସୁସ୍ କାଲିସିୟାତେ ଅଲ୍ମାକାଦ୍ ପାଉଲୁସ୍‌ଆଃ ଚିଟାଉ ଲେକା ତାନାଃ । ପୁରାଃ ହତ୍‌କ ବିଶ୍ୱାସାଃକ ଯେ, ପାହିଲା ପାତ୍ରରାସ୍ ଯୀଶୁ ଖ୍ରୀଷ୍ଟ୍‌ଆଃ ଜାନାମ୍‌ରେୟାଃ ୬୫ ବାରାଷ୍ ତାୟମ୍‌ତେ ଅଲ୍ମାକାନ୍ ତାଇକେନା । ପାତ୍ରରାସ୍ ନେ ଚିଟାଉ ରୋମ୍ ନାଗାର୍‌ହେତେ ଅଲ୍ମାକାଦା, ଅକ୍‌ନାଃକେଚି ବାବିଲୋନ୍ ମେନ୍ତେ ଇନିଃ କାଜିୟାଃଏ ୫:୧୩ ।

ପାତ୍ରରାସ୍ ନେ ଚିଟାଉରେ କାଜିୟାଃଏ ଯେ, ନେ ଚିଟାଉରେୟାଃ ଉକେଶ୍ ଆପେକେ ଜୀଉରେ ରାସ୍‌କା ଏମ୍ ନାଗେନ୍ତେ ଆତଃ ପାର୍‌ମେଶ୍ୱାର୍‌ଆଃ ସାର୍‌ତି ସାୟାଦ୍‌ରେୟାଃ ଗାଞ୍ଜା ଏମ୍ ନାଗେନ୍ତେ ତାନାଃ ୫:୧୨; ୧ ପାତ୍ରରାସ୍ ୨:୧୧-୩:୭; ଏଫିସିୟ ୫:୧୮-୬:୯, ଆତଃ କଲସିୟ ୩:୧୮-୪:୬ ନେଆଁରେ ମିଦ୍‌ଜକାଗି ମେନାଃ । ନେ ଆପିୟା ଚିଟାଉରେୟାଃ ସବେନ୍ ଆଧ୍ୟାୟରେ କୁଟୁମ୍ କୁପୁଲ୍‌କଆଃ ନାତା ବିଷାଏରେ ଆତଃ ଆକ୍‌ତେୟାର୍ ନାମାକାଦ୍‌କକେ ମାନାତିଙ୍ଗ୍ ବିଷାଏରେ ଇନିତୁ ଏମାଃଏ । ଟୁଣ୍ଟୁ ଦ୍ରିପିଲି ନାଡେଜଃତାନ୍ ହରାତେ ଇନିଃ ଦୁକୁ ଇମ୍‌ତାହଗି ସାହାତିଙ୍ଗ୍‌କେଦ୍‌ତେ ତାଇନଃ ନାଗେନ୍ତେ ଖ୍ରୀଷ୍ଟିୟାନ୍ ହତ୍‌କକେ ଜୀଉରେ ରାସ୍‌କା ଏମାଃଏ ୪:୧ ।

### ପୃଥ୍ ଭିଟାରରେ ତାଇକାନ୍ କାଜି

୧. ପାତ୍ରରାସ୍ ଆୟାଃ ପାତ୍ରାଅତାନ୍ ହତ୍‌କକେ ଆୟାଃ ବିଷାଏରେ

ପାରିବାସ ଆଡ଼େ ଆୟାଃ ଆପୁଆଃ ଅଡ଼ାଃ ଠାୟାଦ୍ ଏମାଃଏ ।  
୧:୧-୨

୨. ପାଡ଼ରାସ୍ ପାର୍ମେଶ୍ୱାଋକେ ଧାନ୍ୟାବାଦ୍ ଏମାଃଏ ଯେ,  
ସବେନକ ପାର୍ମେଶ୍ୱାଋଆଃ ପାରିତ୍ରାଣ୍ଡରେୟାଃ ହିସା  
ହବାଅଃଆକ, ଅକନାଃ ଆକଆଃ ଜୀଦାନରେୟାଃ ଉଦେଶ୍  
ତାନାଃ । ୧:୩-୨:୧୦
୩. ଅତେଦିଶୁମ୍ବରେ ଚିଲକା ବୁଗିଲେକା ଜୀଦାନ ବିତାଅ ହବାଅଃ  
ଲାଗାତିଙ୍ଗୟାଃ ଆଡ଼େ କଡ଼ା କୁଡ଼ି, ଗୁସିୟାଃ ଆଡ଼େ ଦାସି  
ଆଲାରେ ଚିଲକା ନାତା ଦହ ଲାଗାତିଙ୍ଗୟାଃ ଏନାରେୟାଃ  
ଇନିତୁ ଏମାଃଏ । ୨:୧୧-୪:୧୧
୪. ଦୁକୁ ଇମ୍ବତାକରେ ସାହାତିଙ୍ଗକେଦ୍ତେ ତାଇନଃ ନାଗେନ୍ତେ  
ପାଡ଼ରାସ୍ ଇନ୍କୁକେ ଜୀଉରେ ରାସ୍ତକା ଏମାଃଏ । ୪:୧୨-୫:୧୧
୫. ଏନ୍ତେ ଇନିଃ ଆୟାଃ ଚିଗାଉ ଅଲକେଦ୍ତେ ଚାବାକେଦା ।  
୫:୧୨-୧୪

<sup>୧</sup> ଆଇଙ୍ଗ୍ ପାଡ଼ରାସ୍ ଯୀଶୁ ଖ୍ରୀଷ୍ଟଆଃ ମିଆଁଦ୍ କୁଲକାନନିଃ  
ତାନିଙ୍ଗ୍, ପନ୍ତସ୍, ଗାଲାତିୟ, କାପାଦକିଆ, ଏସିଆ, ବେଥ୍ନିଆ,  
ରାଇଜକରେ ଛିତିବିତିକେଦ୍ତେ ତାଇନଃତାନ ପାର୍ମେଶ୍ୱାଋଆଃ  
ସାଲାକାନ ହଡ଼କକେ ନେ ଚିଗାଉ ଅଲେତାନାଇଙ୍ଗ୍ ।

<sup>୨</sup> ଆପୁ ପାର୍ମେଶ୍ୱାଋ ସିଦାରେ ଉହାଟକାଦ୍ ସେଣ୍ଟା  
ଲେକାତେ ଆପେ ସାଲାକାନାପେ ଆଡ଼େ ଯୀଶୁ ଖ୍ରୀଷ୍ଟଆଃ କାଜି  
ମାନାତିଙ୍ଗକେଦ୍ତେ ଆୟାଃ ମାୟୋମ୍ବରେ ଫାରିତିୟଃ ନାଗେନ୍ତେ  
ଆପେ ପାବିତାରୁ ଆମାତେ ପାବିତାରୁ ହଡ଼ପେ ବାଇୟାକାନା ।  
ପାର୍ମେଶ୍ୱାଋଆଃ ସାୟାଦ୍ ଆଡ଼େ ଜୀଉସୁକୁ ଆପେୟାଃ ପୁରାଃତେ  
ହବାଅଃକା ।

### ମିଆଁଦ୍ ଜାନିଦରାଃ ଆସ୍ତା

<sup>୩</sup> ଆବୁଆଃ ପ୍ରାଭୁ ଯୀଶୁ ଖ୍ରୀଷ୍ଟ, ଆପୁ ପାର୍ମେଶ୍ୱାଋଆଃ ସାହାରାଅ  
ହବାଅଃକା, ଚିୟାଃଚି ଆୟାଃ ମାରାଙ୍ଗ୍ ଦାୟାତେ ଯୀଶୁ ଖ୍ରୀଷ୍ଟକେ  
ଗନଏଃହେତେ ଜୀଉବିରିଦକିୟାଏ, ଆଡ଼େ ଆବୁକେ ନାଞ୍ଜା  
ଜୀଞ୍ଜାନ ଏମାକାଦ୍ବୁଆଏ । ନେଆଁ ଆବୁକେ ଜାନିଦ୍ ଆସ୍ତାରେ  
ପେରେଜାକାଦ୍ବୁଆ । <sup>୪</sup> ଏନାମେନ୍ତେ ପାର୍ମେଶ୍ୱାଋ ଆୟାଃ ହଡ଼କ  
ନାଙ୍ଗ୍ ମାରାଙ୍ଗ୍ ଆଶିଷ୍ ଦହାକାଦାଏ, ଏନାକେ ନାମେ ନାଗେନ୍ତେ ଆବୁ

ସବେନକ ତାଜ୍ଜିତାନାବୁ । ଇନିଃ ଏନାକେ ଆପେ ନାଗେନ୍ତେ ସିର୍ମାରେ ଦହାକାଦା । ଏନ୍ତାଃରେ ଏନା କା ସୟାଃଃ, କା ଜିୟନଃଆ, ଆତଃ କା ଗସଃଆ । <sup>୫</sup> ତୁଣ୍ଡୁ ଦିପିଲିରେ ଅକ ଜୀଉବାଞ୍ଚାଅ ଉଦୁବଃ ନାଗେନ୍ତେ ସେକାଡ଼ାକାନା, ଏନାକେ ନାମେ ନାଙ୍ଗ ଆପେୟାଃ ବିଶ୍ୱାସ୍ ହରାତେ ପାରମେଶ୍ୱାରଆଃ ପେଡ଼େଃତେ ଜାଡ଼ନାଅ କାନାପେ ।

<sup>୬</sup> ଏନାତେ ଆପେ ରାସ୍‌କାଅଃପେ । ହବାସାକାଅଆଃ ଚିମିନ୍ ରାକାମ୍‌ରେୟାଃ ଦୁକୁହାସୁ ହରାତେ ଆପେକେ ନାହାଁଃ କାଟିଃ ଘାଡ଼ିକାଦ୍ ନାଙ୍ଗ୍ ଦୁକୁ ହବାଅଃ ଲାଗାତିଙ୍ଗ୍‌ୟାଁଃ । <sup>୭</sup> ଆପେୟାଃ ବିଶ୍ୱାସ୍ ସାରତିତାନାଃଟି ନାହାଁଲାଃ ଏନା ବିଡ଼ାଅ ନାଗେନ୍ତେ ନେ ସବେନାଃରାଃ ଉଦେଶ୍ ତାନାଃ । ସୋନାକେ ସେଙ୍ଗେଲ୍‌ରେ ବିଡ଼ାଅକେଦ୍‌ତେ ବୁଗିନାଃ ତାନାଃଟି ନାହାଁଲାଃ ଏନା ସାରିୟଃଆ, ମେନ୍‌ଦ ଏନା ଜିୟନଃତେୟାଃ ତାନାଃ । ଆପେୟାଃ ବିଶ୍ୱାସ୍ ସୋନାଏତେୟାଗି ପୁରାଃ ଗନଙ୍‌ଆନ୍ ତାନାଃ ଏନା ନାଗେନ୍ତେ ବିନିଡ଼ାଅ ହରାତେ ଏନାକେ ପକ୍‌ତାଏ ଲାଗାତିଙ୍ଗ୍‌ୟାଁଃ । ଏନା ହବା ଦାଡ଼ିୟଃରେ, ଯୀଶୁ ଖ୍ରୀଷ୍ଟଆଃ ଉନୁଦୁବ୍ ଦିପିଲିରେ ଆପେ ମାଇନାନ୍, ମାନାରାଙ୍ଗ୍, ଆତଃ ସାହାରାଅପେ ନାମେୟା । <sup>୮</sup> ଆପେ ଇନିଃକେ କାପେ ନେଲ୍‌କାଇରେୟ ଦୁଲ୍‌ଡ଼ିତାନାପେ ଆତଃ ନାହାଁଃ ହୁଁ କାପେ ନେଲିତାନ୍‌ରେୟ ଇନିଃତାଃରେ ବିଶ୍ୱାସ୍‌କେଦ୍‌ତେ କା କାଜି ଦାଡ଼ିୟଃ ଲେକା ମାନାରାଙ୍ଗ୍ ରାସ୍‌କାତେପେ ରାସ୍‌କାଅଃତାନା, <sup>୯</sup> ଚିଆଃଟି ଆପେୟାଃ ବିଶ୍ୱାସ୍‌ରେଆଃ ନାଲା ଆପେୟାଃ ଆମ୍‌ରାଃ ଜୀଉବାଞ୍ଚାଅ ତାନା, ଏନାପେ ନାମାକାଦା ।

<sup>୧୦</sup> ନେ ଜୀଉବାଞ୍ଚାଅ ବିଷାଏରେ ନାବୀକ ପୁରାଃ ବୁଗିଲେକା ଦାଣାଁ ନାମ୍‌କେଦ୍‌ତେ ଇନ୍‌କୁ ପାରମେଶ୍ୱାରଆଃ ନେ ସାୟାଦ୍‌ରେୟାଃ ବାର୍‌ଦାନ୍ ବିଷାଏରେକ କାଜିଆୟାର୍‌କେଦା । <sup>୧୧</sup> ଏନ୍ ବାର୍‌ଦାନ୍‌କେ ଆପେ ଚିଉଲା ଆତଃ ଚିଲ୍‌କାତେପେ ନାମେୟା, ଏନା ସାରିନାମ୍ ନାଗେନ୍ତେ ଇନ୍‌କୁ ଚେଷ୍ଟା ତାଇକେନାକ । ଏନ୍ ବିଷାଏରେ ପାବିତାର୍ ଆମ୍‌ରାଃ ଦେଙ୍ଗାତେ ଇନ୍‌କୁ ଖ୍ରୀଷ୍ଟଆଃ ଦୁକୁ ଆତଃ ତାୟମ୍‌ତେରାଃ ମାନାରାଙ୍ଗ୍ ବିଷାଏରେ ଆୟାର୍‌କାଜି କାଜିକାଦ୍ ତାଇକେନାକ । <sup>୧୨</sup> ନେ ସବେନ୍ ବିଷାଏରେ ଇନ୍‌କୁ ଆକଆଃ ଆପ୍‌ନାଃ ସୁନୁସାର୍ କା ରିକାକେଦ୍‌ତେ ଆପେୟାଃ ସୁନୁସାର୍ ରିକା ତାଇକେନାକ, ମେନ୍‌ଦ ଇନ୍‌କୁ ଆକଆଃ ବୁଗିନ୍ ନାଗେନ୍ତେ ଜେଡ଼ନାଃ କାକ କାମିକେଦା

। ଇନ୍କୁ କାଜି ତାଇକେନ୍ତେୟାଃ ଆପେ ନାଗେନ୍ତେ ଉଦୁବକାନ୍ ତାଇକେନା । ଏନା ସିର୍ମାଏତେ କୁଲ୍ୟାକାନ୍ ପାବିତାର୍ ଆମ୍ବାରାଃ ପେଡ଼େଃତେ ନାହାଃ କାଜି ଏମ୍ତାନ୍କଆଃ ହରାତେ ଆପେତାଃତେ ସୁକୁକାଜି ଉଦୁବାକାନା, ଏନ୍ ସବେନ୍ ବିଷାଏ ଦୁଠକହ ନେଲ୍ ନାଗେନ୍ତେକ ସାନାଙ୍ଗ୍ତାନା ।

### ପାବିତାର୍ ଜୀଞ୍ଜାନ୍ ବିତାଅ ନାଗେନ୍ତେ କେନେଡ଼ା

<sup>୧୩</sup> ଏନାମେନ୍ତେ, କାମି ନାଙ୍ଗ୍ ଆପେୟାଃ ମନ୍ରେ ସେକାଡ଼ାକାନ୍ ତାଇନ୍ପେ । ଚିର୍ଗାଲ୍ୟାକାନ୍ପେ, ଯୀଶୁ ଖ୍ରୀଷ୍ଟ ଉଦୁବଃ ଇମ୍ତାରେ ଆପେକେ ଅକ ସାୟାଦ୍ରେୟାଃ ଜୀଉବାଞ୍ଚାଅ ଏମ୍ତା ଏନାରେ ପୁରାଃତେ ଆସ୍ତା ଦହେପେ । <sup>୧୪</sup> ପାର୍ମେଶ୍ୱାର୍ଆଃ କାଜି ମାନାତିଙ୍ଗ୍ପେ, ଆଡ଼ଃ ଆପେ ବେଗାର୍ ସାରିତେ ଏଡ଼କାନ୍ ସାନାଙ୍ଗ୍ରେପେ ଜୀହୁଦଃ ତାଇକେନ୍ ଲେକା ଆଲ୍ପେ ସେସେନା । <sup>୧୫</sup> ମେନ୍ଦ୍ ଆପେକେ କେଡ଼ାକେନ୍ନିଃ ପାବିତାର୍ ମେନାଇ ଲେକାଗି ଆପେୟ୍ ସବେନ୍ ତାଇଲ୍ ତାଲାନ୍ରେ ପାବିତାରଃପେ । <sup>୧୬</sup> ଧାରାମ୍ପୁଅରେ ଅଲ୍ୟାକାନା, “ଆପେ ପାବିତାରଃପେ ଚିୟାଃତି ଆଇଙ୍ଗ୍ ପାବିତାର୍ ତାନିଙ୍ଗ୍ ।”

<sup>୧୭</sup> ପାର୍ମେଶ୍ୱାର୍ ଜେତାଏୟାଃ ମେନ୍ଦ୍ମୁହାଡ଼୍ କା ନେଲ୍କେଦ୍ତେ ଆକଆଃ କାମି ଲେକାତେ ବିଚାର୍କଆ । ଆପେ ଇନିଃତାଃରେ ବିନ୍ତି ଇମ୍ତା ଇନିଃକେ ଆପୁ ମେନ୍ତେପେ ମାଇନିତାନ୍ରେଦ୍, ନେ ଅତେରେ ଆପେୟାଃ ଜୀଞ୍ଜାନ୍ ବାଚାଅକାନ୍ ନେତାରେ ଇନିଃକେ ବରଭାଲ୍ତିତାନ୍ଲଃ ଜୀଞ୍ଜାନ୍ ବିତାଏପେ । <sup>୧୮</sup> ଆପେଦ୍ ସାରିତାନାପେ, ଆପେୟାଃ ପୁରଣା ହଡ଼କତାଃଏତେ ହିଜୁଃକାନ୍ ରିତିରିଞ୍ଜାନ୍ ଆଡ଼ଃ ସାମାରେୟାଃ ଜୀଞ୍ଜାନ୍ଏତେ ଆପେକେ ମୁଲ୍ଟି ଏମ୍ ନାଙ୍ଗ୍ ପାର୍ମେଶ୍ୱାର୍କେ ଗନଙ୍ଗ୍ ଏମ୍ ଲାଗାତିଙ୍ଗ୍ ତାଇକେନା । ଏନା ରୁପା ଚାଏ ସୋନା ଲେକାନ୍ ଜିୟନଃ ଜିନିଷ୍ କା ତାଇକେନା, <sup>୧୯</sup> ମେନ୍ଦ୍ ବେଗାର୍ ଦାଗିକାନ୍ ଆଡ଼ଃ କା ଚିଚାକାନ୍ ମିଶ୍ଟିହନ୍ ଲେକା ଯୀଶୁ ଖ୍ରୀଷ୍ଟଆଃ ପୁରାଃ ଗନଙ୍ଗ୍ଆନ୍ ମାୟୋମ୍ତେ ରାଡ଼ାକାନାପେ । <sup>୨୦</sup> ଇନିଃଦ୍ ଅତେଦିଶ୍ୱମ୍ରେୟାଃ ବାଇୟଃ ସିଦାରେ ପାର୍ମେଶ୍ୱାର୍ତେ ସାଲ୍ୟାକାନ୍ ତାଇକେନାଏ ଆଡ଼ଃ ଆପେ ନାଗେନ୍ତେ ନେ ଟୁଣ୍ଟୁ ଦିପିଲିରେ ଉଦୁବାକାନା । <sup>୨୧</sup> ପାର୍ମେଶ୍ୱାର୍ ଇନିଃକେ

ଗଜାକାନକଏତେ ଜୀଉବିରିଦକିୟା ଆଡ଼ଃ ମାନାରାଙ୍ଗ୍ ଏମ୍‌କିୟାଏ । ଇନିୟାଃ ହରାତେ ଆପେ ପାର୍‌ମେଶ୍‌ବରକେପେ ବିଶ୍ୱାସୀ ତାନା, ଏନାତେ ପାର୍‌ମେଶ୍‌ବରତାଃରେ ଆପେୟାଃ ବିଶ୍ୱାସ୍ ଆଡ଼ଃ ଆସ୍ତା କେଟେୟଃ ତାନା ।

<sup>୨୨</sup> ନାହାଁଃ ଆପେ ସାର୍‌ତି ମାନାତିଙ୍ଗ୍‌ତାନ୍ ହରାତେ ଆପେ ଆପେଗି ଫାର୍‌ତିଆକାନାପେ ଆଡ଼ଃ ବିଶ୍ୱାସ୍‌ତାନ୍ ହାଗାକକେ ଆପେୟାଃ ସବେନ୍ ମନ୍‌ସୁରୁଦ୍‌ତେ ଦୁଲ୍‌ଡ଼କପେ, ଆଡ଼ଃ ସବେନ୍‌କଲଃ ଦୁପୁଲ୍‌ଡ଼ରେ ତାଇନ୍‌ପେ । <sup>୨୩</sup> ଚିୟାଃତି ପାର୍‌ମେଶ୍‌ବରଆଃ ଜାନିଦ୍ ଆଡ଼ଃ କା ଜିୟନଃ ବାଚାନ୍‌ତେ ତାଏ ଆପେଦ ଗନଏଃରେନ୍ ଆପୁଆଃ ହନ୍ ଲେକା କାହାଗି ମେନ୍‌ଦ କା ଗନଏଃ ଆପୁଆଃ ହନ୍ ଲେକାପେ ଜାନାମ୍‌ରୁହାଡ଼କାନା । <sup>୨୪</sup> ଧାରାମ୍‌ପୁଥ୍‌ରେ ଅଲ୍‌କାନା, “ସବେନ୍ ହଡ଼କ ତାସାଦ୍ ଲେକାଃକ,

ଆଡ଼ଃ ଇନ୍‌କୁଆଃ ସବେନ୍ ସୁଗାଡ଼ାନ୍‌ତେୟାଃ ବିର୍ ବାହା ଲେକାଃ ।

ତାସାଦ୍ ରହଡ଼କଆଃ ଆଡ଼ଃ ବାହା ଗାସାରକଆଃ,

<sup>୨୫</sup> ମେନ୍‌ଦ ପାର୍‌ମେଶ୍‌ବରଆଃ ବାଚାନ୍ ଜାନାଅ ଜାନାଅ ଜାକେଦ୍ ତାଇନାଃ ।”

ନେଆଁ ଏନ୍ ସୁକୁକାଜି ଅକ୍‌ନାଃ ଆପେତାଃରେ ଉଦୁବାକାନା ।

## ୨

### ଜାନିଦ୍ ଦିରି ଆଡ଼ଃ ପାବିତାର୍ ହଡ଼କ

<sup>୧</sup> ଆପେ ସବେନ୍ ଲେକାନ୍ ଏଡ଼କାନାଃଏତେ ସାଙ୍ଗିନେନ୍‌ପେ । ସବେନ୍ ଏଡ଼କାନ୍ କାଜି ତାଏ ହସଡ଼ କାଜି ତାଏ ହିସ୍‌ଜା କାଜି ତାଏ ରୁପ୍‌ରା କାଜିକ ବାଗିପେ । <sup>୨</sup> ନାଝାଜାନାମ୍ ହନ୍‌ଲେକା ହବାଅଃପେ । ସବେନ୍ ଇମ୍‌ତା ଫାର୍‌ତି ଆମ୍‌ିକ୍ ତଆ ନୁଁ ନାଗେନ୍ତେ ତେତାଙ୍ଗ୍‌ଅଃପେ, ଜେ'ଲେକାତି ଆପେ ନୁଁକେଦ୍‌ତେ ହାରା ଦାଡ଼ିୟଃଆପେ ଆଡ଼ଃ ବାଞ୍ଛାଅପେ ନାମେୟା । <sup>୩</sup> ଧାରାମ୍‌ପୁଥ୍‌ରେ ଅଲ୍‌କାନା, “ପ୍ରାଭୁ ଚିମିନ୍ ଦାୟାଲୁ ତାନିଃ, ଏନା ଆପେ ଆର୍‌କାର୍‌ଉରୁମ୍ କାଦାପେ ।”

<sup>୪</sup> ଜାନିଦ୍ ଦିରି ଲେକାନ୍‌ନିଃଗି ଏନ୍ ପ୍ରାଭୁ ତାନିଃ, ହଡ଼କ ଇନିଃକେ କା ଗନଙ୍ଗ୍‌ଆଁନ୍ ଲେକା ଗେନା ଆତମ୍‌କିୟାକ, ଇନିଃତାଃତେ ହିଜୁଃପେ, ଚିୟାଃତି ପାର୍‌ମେଶ୍‌ବରତାଃରେ ଇନିଃ ପୁରାଃ ଗନଙ୍ଗ୍‌ଆଁନ୍ ହବାକେଦ୍‌ତେ ସାଲାୟାନାଏ । <sup>୫</sup> ଆପେ ମିଆଁଦ୍ ଆମ୍‌ିକ୍ ମାନ୍‌ିର୍

ବାଇୟେନ୍ ନାଜ୍ ଜାନିଦ୍ ଦିରି ଲେକା ବାଉରାଅଃ ନାଗେନ୍ତେ ହିଜୁଃପେ । ଏନ୍ ମାନ୍ଦିର୍ ଅଡ଼ାଃରେ ଆପେ ଯୀଶୁ ଖ୍ରୀଷ୍ଟୁଆଃ ହରାତେ ପାର୍ମେଶ୍ୱାର୍ ସୁକୁଃଆଏ ଲେକା ଆମିକ୍ ଦାଣ୍ଟେ ରାକାବ୍ ନାଗେନ୍ତେ ପାବିତାର୍ ଯାଜାକ୍ କାମି କାମିୟାପେ ।<sup>୬</sup> ଚିୟାଃଟି ଧାରାମ୍ପୁଥିରେ ଅଲ୍ଲାନା,

“ଆଲେ ମିଆଁଦ୍ ପୁରାଃ ଗନଙ୍ଗୁଆଁନ୍ ଦିରି ସାଲ୍ଲାନାଦାଲେ,  
ଏନାକେ ଆଲେ ସିୟୋନ୍ରେୟାଃ କଚା ଦିରି ଲେକାଲେ ମାଣ୍ଡାଅକାଦା ।

ଜେତାଏ ଇନିଃରେ ବିଶ୍ୱାସେନିଃ, ଚିଉଲ୍ଲାଅ କାଏ ଗିହୁଗଃଆ ।”

<sup>୭</sup> ଆପେ ବିଶ୍ୱାସ୍ତାନ୍ ହରାତେ ନେ ଦିରି ଆପେୟାଃ ନାଜ୍ ପୁରାଃଟି ଗନଙ୍ଗୁଆଁନ୍ ତାନାଃ । ମେନ୍ଦ୍ କା ବିଶ୍ୱାସ୍ତାନକଆଃ ନାଜ୍,

“ଅଡ଼ାଃ ବାବାଇକ ଅକନ୍ ଦିରିକେ ଗେନା ଆତମ୍‌କେଦାକ୍,

ଏନା ନାହାଁଃ ସବେନାଃରାଃ କଚା ଦିରି ହବାୟାନା ।”

୮ ଧାରାମ୍ପୁଥିରେ ଆଡ଼ଃଟି ଅଲ୍ଲାନା,

“ନେ ସେରେଙ୍ଗ୍ ଦିରି ଚେତାନରେ ପୁରାଃ ହଡ଼କ ତହଦଃଆକ୍,

ନେ ସେରେଙ୍ଗ୍ ହରାତେ ଇନ୍‌କୁଆଃ ଜିୟନ୍ ହବାଅଃଆ

।” ଇନ୍‌କୁ ପାର୍ମେଶ୍ୱାର୍‌ଆଃ ବାଚାନ୍‌କେ କାକ୍

ମାନାଡ଼ିଙ୍ଗ୍‌କେଦା, ଏନାତେ ଇନ୍‌କୁ ତହଦ୍‌ୟାନାକ ।

ନେଆଁ ଇନ୍‌କୁଆଃ ନାଗେନ୍ତେ ପାର୍ମେଶ୍ୱାର୍‌ଆଃ ସାନାଜ୍ ତାଇକେନା ।

<sup>୯</sup> \*ମେନ୍ଦ୍ ପାର୍ମେଶ୍ୱାର୍ ଆପେକେ ନୁବାଃହେତେ ଆୟାଃ

ଆକ୍‌ଦାଦାଅ ମାସ୍ଲାଲ୍‌ତେ କେଡ଼ାକାଦ୍‌ପେୟା, ଜେ'ଲେକାଟି ଆପେ

ପାର୍ମେଶ୍ୱାର୍‌ଆଃ ଆକ୍‌ଚାକାଅ କାମିକପେ ଉଦୁବେଆ, ଏନାମେନ୍ତେ

ଆପେ ମିପିହୁଡ୍ ସାଲ୍ଲାନାନ୍ ହଡ଼କ ତାନ୍‌ପେ, ରାଜା ଲେକାନ୍

ଯାଜାକ୍ କିଲିକ୍, ପାବିତାର୍ ହଡ଼କ, ଆଡ଼ଃ ପାର୍ମେଶ୍ୱାର୍‌ଆଃ ଆୟାଃ

ହଡ଼କପେ ହବାକାନା ।<sup>୧୦</sup> ସିଦା ଆପେ ପାର୍ମେଶ୍ୱାର୍‌ଆଃ ହଡ଼କ

କାପେ ତାଇକେନା, ମେନ୍ଦ୍ ନାହାଁଃ ଆୟାଃ ହଡ଼କ ତାନ୍‌ପେ ।

ସିଦା ପାର୍ମେଶ୍ୱାର୍‌ଆଃ ଦାୟା କାପେ ସାରିକାଦ୍ ତାଇକେନା, ମେନ୍ଦ୍

ନାହାଁଃ ଆପେ ଇନିୟାଃ ଦାୟା ନାମାକାଦାପେ ।

### ପାର୍ମେଶ୍ୱାର୍‌ଆଃ ଦାସି

\* ୨:୯ ୨:୯ ଡିଡସ୍ ୨:୧୪.

୧୧ ହେ ଦୁଲ୍ଲାଡ଼୍ ହାଗା ମିଶିକ, ଆପେ ନେ ଅଡେଦିଶୁମ୍ରେନକ ନାହାଁଲାପେ ଆଡ଼ଃ କା ଚିହ୍ନାଁର ଲେକାନକ ତାନପେ, ଏନାମେନ୍ତେ ଆଇଙ୍ଗ୍ ଆପେକେ ବିକ୍ରିପେ ତାନାଇଙ୍ଗ୍, ଆପେ ହଡ଼ମ୍ରେୟାଃ ଏଡ଼କାନ୍ ସାନାଙ୍ଗ୍‌ଏଡେ ସାଙ୍ଗିନେନ୍‌ପେ, ଏନାକଦ ଆମ୍‌ରେୟାଃ ବିରୁଧରେ ଲାଡ଼ାଇୟାଃ । ୧୨ ସାଅଁସାର୍ ହଡ଼କଆଃ ଆଲାରେ ଆପେୟାଃ ଚାଇଲ୍ ଚାଲାନ ବୁଗିଲେକା ହବାଅଃ ଲାଗାତିୟାଁ, ଚିମ୍ତା ଇନ୍‌କୁ ଆପେକେ ଏଡ଼କାନ୍ କାମିହଡ଼ ମେନ୍ତେକ ହିଲାଙ୍ଗ୍‌ପେରେ, ଆପେୟାଃ ବୁଗିନ୍ କାମି ନେଲକେଦଡେ ଯାଶୁ ଖ୍ରୀଷ୍ଟଆଃ ହିନିଜୁଃ ହୁଲାଙ୍ଗ୍‌ରେ ପାରମେଶ୍ୱାରକେକ ମାଇନିୟା ।

୧୩ ପ୍ରାଭୁଆଃ ନୁତୁମଡେଇଙ୍ଗ୍ ବିକ୍ରିପେ ତାନା, ସବେନ୍ ଆକଡେୟାର୍ ନାମାକାଦ୍ ହଡ଼କଆଃ ଆବର୍ରେ ତାଇନପେ । ରାଜା ତାଇନଃ ଚାଏ, ଲାଟ୍‌ସାହେର୍, ଆଡ଼ଃ ଏଟାଃ ହାକିମ୍‌କେକେ ମାନାତିଙ୍ଗ୍‌କପେ । ୧୪ ହାକିମ୍‌କ, ଏଡ଼କାନ୍ ହଡ଼କକେ ସାଜାଇ ଏମ୍ ନାଗେନ୍ତେ ଆଡ଼ଃ ବୁଗିନ୍ କାମି କାମିକାଦ୍ ହଡ଼କକେ ସାହାରାଅକ ନାଗେନ୍ତେ ଇନିଃ ଇନ୍‌କୁକେ ସାଲାକାଦ୍‌କଆ । ୧୫ ଆପେ ବୁଗିନ୍ କାମିଡେ କା ସେଣ୍‌ନ୍ ଡଣ୍ଡ ହଡ଼କକେ ହାପାଉଡାରକପେ, ଏନା ପାରମେଶ୍ୱାରଆଃ ସାନାଙ୍ଗ୍ ତାନାଃ । ୧୬ ରାଡ଼ାକାନ୍ ହଡ଼କ ଲେକା ଜୀହୁଦଃପେ, ମେନ୍‌ଦ ଆପେ ରାଡ଼ାକାନାଲେ ମେନ୍ତେ ଏଡ଼କାନ୍ କାମିରେଲେ ତାଇନା ମେନ୍ତେ କା ଉଡ଼ଃକେଦଡେ, ପାରମେଶ୍ୱାରଆଃ କିରିଙ୍ଗ୍‌ୟାକାନ୍ ଦାସି ଲେକା ଜୀଞ୍ଜାନ୍ ବିତାଏପେ । ୧୭ ସବେନକକେ ମାଇନକପେ, ଏଟାଃ ବିଶ୍ୱାସୀ ହାଗା ମିଶିକକେ ଦୁଲ୍ଲାଡ଼୍‌କପେ, ପାରମେଶ୍ୱାରକେ ବରଆଇପେ, ଆଡ଼ଃ ରାଜାକେ ମାଇନପେ ।

### ୟାଶୁ ଖ୍ରୀଷ୍ଟଆଃ ଦୁକୁରେୟାଃ ନାମୁନା

୧୮ ହେ ଦାସିକ, ଆପେ ବରତାନଲଃ ଆପେୟାଃ ଗମ୍‌କେକକେ ମାଇନକପେ, ବୁଗିନ୍ ଆଡ଼ଃ ଲେବେଃମନ୍‌ରେନ୍ ହଡ଼କକେ ଏସ୍‌କାର୍ କାହା, ମେନ୍‌ଦ କା ଲେବେଃମନ୍‌ରେନ୍ ହଡ଼କକେହ ମାଇନକପେ । ୧୯ ଆପେ ପାରମେଶ୍ୱାରଆଃ ଇଛା ସାରିକାଦ୍ ହରାଡେ ବେଗାର୍ ଗୁହ୍ନାଁରେ ସାସାତି ନାମେତାନଲଃ ଦୁକୁପେ ସାହାତିଙ୍ଗ୍ ତାନରେଦ, ପାରମେଶ୍ୱାର ଆପେକେ ଆଶିଷପେୟା । ୨୦ ଆପେ ଗୁହ୍ନାଁକେଦଡେ ସାଜାଇପେ ନାମେରେଦ, ଏନାରେ ଚିକାନ୍ ମାରାଙ୍ଗ୍ ତାନାଃ

? ମେନ୍ଦ ଆପେ ବୁଗିନ୍ କାମିକେଦ୍‌ତେ ଦୁକୁପେ ସାହାତିଙ୍ଗ୍ ତାନ୍‌ରେଦ୍, ଏନାରେ ପାର୍‌ମେଶ୍‌ବାର୍ ଆପେକେ ଆଶିଷ୍‌ପେୟା ।  
 ୨୧ ପାର୍‌ମେଶ୍‌ବାର୍ ନେଆଁ ନାଗେନ୍ତେ ଆପେକେ କେଡ଼ାକାଦ୍‌ପେୟା ।  
 ଯୀଶୁ ଖ୍ରୀଷ୍ଟ୍ ଆଇଃକ୍‌ଗି ଆପେ ନାଗେନ୍ତେ ଦୁକୁ ସାହାତିଙ୍ଗ୍‌କେଦ୍‌ତେ  
 ନାମୁନା ଉଦୁବକାଦା, ଜେ'ଲେକାଚି ଆପେ ଆୟାଃ ଉଦୁବକାଦ୍  
 ହରାକେପେ ଅତଙ୍ଗ୍ ଦାଡ଼ିୟା । ୨୨ ଇନିଃ ଜେଡ଼ନାଃ କାଏ ପାପ୍‌କାଦା,  
 ଆଡ଼ଃ ଆୟାଃ ମଚାଏତେ ବେଦା କାଜି ଅତଙ୍ଗ୍‌ଅଃତେୟାଃ ଜେତାଏ  
 ଚିତ୍‌ଲାଅ କାକ ଆୟୁମ୍‌କାଦା । ୨୩ ଇନିଃକେ ଲାନ୍‌କାୟାକ ଇମତା  
 ଇନିଃ ଇନ୍‌କୁକେ କାଏ ଲାନ୍‌ରୁହାଡ଼କେଦ୍‌କଆ, ଦୁକୁ ନାମ୍‌କେଦ୍  
 ଇମତା ଇନ୍‌କୁଆଃ ବାଦ୍‌ଲା ଇଦିନାଙ୍ଗ୍ କାଏ ବତଙ୍ଗ୍‌କେଦ୍‌କଆ,  
 ମେନ୍ଦ ନ୍ୟାୟ ବିଚାର୍‌ନିଃ ପାର୍‌ମେଶ୍‌ବାର୍‌ତାଃରେ ପୁରାଃଗି ଆସ୍ରାକାଦ୍  
 ତାଇକେନାଏ । ୨୪ ଆରୁ ଜେ'ଲେକା ପାପ୍ ନାଙ୍ଗ୍ ଗଏଃକେଦ୍‌ତେ,  
 ଧାର୍‌ମାନ୍ ନାଗେନ୍ତେବୁ ଜୀହୁଦଃକା, ଏନାମେନ୍ତେ ଯୀଶୁ ଖ୍ରୀଷ୍ଟ୍  
 ଆଇଃକ୍‌ଗି କୁଗ୍ ଚେତାନ୍‌ରେ ଆୟାଃ ହଡ଼୍‌ମରେ ଆରୁଆଃ ପାପ୍‌କାଏ  
 ଗଅଃକେଦା । ଆରୁ ଆୟାଃ ହଡ଼୍‌ମରେ ହାଣ୍‌ସାକାନ୍ ଘାଅ ହରାତେ  
 ବୁଗିକାନାରୁ । ୨୫ ଆପେଦ୍ ଆଦାକାନ୍ ମିଶ୍ରିକ ଲେକାପେ ତାଇକେନା,  
 ମେନ୍ଦ ନାହାଃ ଆପେୟାଃ ଆମ୍‌ରେନ୍ ମିଶ୍ରିଗୁପିନିଃ ଆଡ଼ଃ  
 ଆଗୁଆଇନିଃକେ ଅତଙ୍ଗ୍‌ଇଁ ନାଗେନ୍ତେପେ ଆଉରୁହାଡ଼ାକାନା ।

## ୩

### ଆଣ୍ଡି କଡ଼ା କୁଡ଼ିକ ନାଙ୍ଗ୍ ଇନିଦୁ

୧ ☆ହେ ଆଣ୍ଡି କୁଡ଼ିକ, ଏନ୍‌ଲେକାଚି ଆପେ ଆପାନ୍ ଆପାନ୍  
 କଡ଼ାକଆଃ ଆବରରେ ତାଇନ୍‌ପେ । ଏନାତେ ଜେତା କଡ଼ା  
 ପାର୍‌ମେଶ୍‌ବାର୍‌ଆଃ ବାଚାନ୍ କାଏ ମାନାତିଙ୍ଗ୍‌ରେଦ୍, ଆୟାଃ କୁଡ଼ିଆଃ  
 ବୁଗିନ୍ ଚାଇଲ୍ ଚାଲାନ୍ ହରାତେ ଇନିଃ ବିଶ୍ୱାସେ ନାଙ୍ଗ୍ ଜିତାଅଇୟାଏ  
 । ଆପେକେ ମିଦ୍‌ପଦ୍‌ହଁ କାଜି କା ଲାଗାତିଙ୍ଗ୍‌ୟାଃ, ୨ ଚିୟାଃଚି  
 ଇନ୍‌କୁ ଆପେୟାଃ ବୁଗିନ୍ ଫାର୍‌ଚିତେୟାଃ ଆଡ଼ଃ ବରଭାଲ୍‌ଲିକ  
 ନେଲେୟା । ୩ ☆ଆପେୟାଃ ସିଙ୍ଗାରେନ୍, ଉବ୍ ଗାଲାଙ୍ଗ୍‌ୟେନ୍, ସୋନା  
 ତୁସିୟେନ୍, ଚାଏ ଲିଜାଃ ତୁସିୟେନ୍, ନେ ସବେନାଃ, ନେପେଲ୍

☆ ୩:୧ ୩:୧ ଏପିସିୟ ୫:୨୨; କଲସିୟ ୩:୧୮. ☆ ୩:୩ ୩:୩ ୧ ତିମଥ ୨:୯.



ସିଙ୍ଗାର ଏସକାର ଆଲକା ହବାଅଃକା, ୪ ମେନ୍ଦ ଆପେୟାଃ  
 ମନ୍ସୁରୁଦ୍ରେୟାଃ ସିଙ୍ଗାରେନ୍ ହବାଅଃତାନା, ଲେବେଃମନ୍ ଆତଃ  
 ବୁଗିନ୍ ସଭାଦ୍, ଏନା ପାର୍ମେଶ୍ଵାର୍ଆଃ ନେପେଲରେ ସବେନାଃଏତେ  
 ଗନଙ୍ଗାନ୍ ଆତଃ କା ଜିୟନଃତେୟାଃ ତାନାଃ । ୫ ଚିୟାଃତି  
 ପାର୍ମେଶ୍ଵାର୍ତଃରେ ଆସ୍ତ୍ରାକାଦ୍ ସିଦା ଦିପିଲିରେନ୍ ପାବିତାର୍  
 କୁଡ଼ିକ ଆକଆଃ କଡ଼ାକଆଃ ଆବର୍ରେ ତାଇନ୍ତାନ୍ ହରାତେ ଆକ  
 ଆକଗି ସିଙ୍ଗାରଃ ତାଇକେନାକ । ୬ ଏନ୍ଲେକାଗି ସାରା ଆବ୍ରାହାମ୍ଆଃ  
 କାଜି ମାନାତିଙ୍ଗେଦ୍ରେତେ ଇନିଃକେ ଆୟାଃ ଗମ୍ବେ ମେନ୍ତେ କାଜି  
 ତାଇକେନା । ନାହାଃ ଆପେୟ ଇନିୟାଃ କୁଡ଼ିହନ୍ଦ୍ ତାନ୍ଦେ, ଆତଃ  
 ଆପେ ବୁଗିନ୍ କାମିପେ ରିକାଏରେଦ୍, ଜେତାନ୍ ବିଷାଏରେ କାପେ  
 ବରଏୟା ।

୭ ଏନ୍ଲେକାଗି ଏ କଡ଼ାକ, ଆପେୟାଃ କୁଡ଼ିକ, ଆପେଏତେ  
 ପୁରାଃଗି ନାରାଦୁରା ମେନ୍ତେ ସାରିତାନ୍ଲଃ ଇନ୍କୁଲଃ ସାହାତିଙ୍ଗେୟେ  
 ଲେକା ଜୀଦାନ୍ ବିତାଏପେ । ଇନ୍କୁକେ ମାଇନ୍କପେ, ଇନ୍କୁହ  
 ପାର୍ମେଶ୍ଵାର୍ଆଃ ସାୟାଦ୍ରେତେ ଆପେଲଃ ଜୀନିଦ୍ରେୟାଃ ନାଲକ  
 ନାମେୟା ଆପେ ଇନ୍କୁକେ ବୁଗିଲେକାପେ ମାଇନ୍କରେଦ୍,  
 ଆପେୟାଃ ବିଗ୍ତିରେ କାଜିକଟଙ୍ଗ କାପେ ନାମେୟା ।

**ବୁଗିନ୍ କାମି ନାଗେନ୍ତେ ଦୁକୁ**

୮ ବୁଶ୍ଟୁର, ଆପେ ସବେନ୍ଦ୍ ମିଦ୍ ମନ୍ରେ ତାଇନ୍କେଦ୍ରେତେ  
 ମିହୁଡ୍ ଆତଃମିହୁଡ୍ଲଃ ହାଗା ମିଗିଲେକା ଦୁପୁଲ୍ଲାଡ଼ରେ ଆତଃ  
 ମିହୁଡ୍ ଆତଃମିହୁଡ୍ରେକେ ଦାୟାତାନ୍ଲଃ ଲେବେଃମନ୍ ଲେକା  
 ହବାଅଃପେ । ୯ ଏଡ଼କାନାଃ ନାଗେନ୍ତେ ଏଡ଼କାନାଃ, ତାଏ  
 ସାର୍ପାଅ ନାଗେନ୍ତେ ସାର୍ପାଅ ଆଲ୍ରେ ଏମ୍ବୁହାଡ଼କଆ, ମେନ୍ଦ୍  
 ଆଗିଷ୍ଟକପେ, ଚିୟାଃତି ଆପେ ପାର୍ମେଶ୍ଵାର୍ତଃଏତେ ଆଗିଷ୍ଟ ନାମେ  
 ନାଗେନ୍ତେପେ କେଡ଼ାକାନା । ୧୦ ଧାରାମ୍ପୁଥ୍ରେ ଅଲକାନା,

“ଜେତାଏ ଜୀଦାନ୍ରେ ସୁକୁ ନାମେ ନାଗେନ୍ତେ  
 ଆତଃ ସୁକୁରାଃ ଦିନ୍ ନେଲ୍ ନାଗେନ୍ତେ ସାନାଙ୍ଗତାନ୍ରେଦ୍,  
 ଇନିଃ ଏଡ଼କାନାଃ ଆଲକାଏ କାଜିକା  
 ଆତଃ ହସଡ୍ ଆଲକାଏ କାଜିକା ।

☆ ୩:୭ ୩:୭ ଏଡ଼ିସିୟ ୫:୨୫; କଲସିୟ ୩:୧୯.

୧୧ ଇନିଃ ଏଡକାନାଃଏତେ ସାଞ୍ଜିନ୍କେଦ୍ତେ ବୁଗିନାଃଏ କାମିକା,  
 ଆଡ଼ଃ ଜୀଉସୁକୁ ଦାଣ୍ଟାକେଦ୍ତେ ଅତଙ୍ଗ୍‌ୟେକା ।

୧୨ ପ୍ରାଭୁଆଃ ନେପେଲ୍‌ରେ ଧାର୍‌ମାନ୍ ହଡକସାଃରେ ମେନାଃ,  
 ଆଡ଼ଃ ଇନ୍‌କୁଆଃ ବିନ୍ତି ଆୟୁମାଃଏ,  
 ମେନ୍‌ଦ ଏଡକାନ୍ କାମିତାନ୍‌କଆଃ ବିନ୍ତି କାଏ ଆୟୁମାଃ ।”

୧୩ ଆଡ଼ଃ ଆପେ ବୁଗିନାଃତେୟାଃରେ ଚିହ୍ନୁଲାନ୍‌ଗିପେ  
 ହବାଅଃରେଦ, ଅକଏ ଆପେୟାଃଏଡକାନ୍ ରିକାୟାଏ? ୧୪\* ମେନ୍‌ଦ  
 ଧାର୍‌ମାନ୍ ନାଗେନ୍ତେ ଆପେକେ ଦୁକୁ ସାହାତିଙ୍ଗ୍ ହବାଅଃରେୟ,  
 ଆପେ ସୁକୁତାନ୍‌ଗିଆ । ଇନ୍‌କୁ ଆପେକେ ବତଙ୍ଗ୍‌ପେରେ ଆଲ୍‌ପେ  
 ବରଏୟା, ଆଡ଼ଃ ଆଲ୍‌ପେ ଆକ୍‌ବାକାଅଃଆ । ୧୫ ମେନ୍‌ଦ ଯୀଶୁ  
 ଖ୍ରୀଷ୍ଟକେ ପ୍ରାଭୁ ମେନ୍ତେ ଆପେୟାଃ ମନ୍‌ସୁରୁଦ୍‌ରେ ମାଈନ୍‌ପେ ।  
 ଆପେତାଃରେ ତାଇନଃତାନ୍ ଆସ୍ରା ବିଷାଏରେ ଜେତାଏ ଆପେକେ  
 କୁଲିପେରେ, ଇନିଃକେ କାଜିରୁହାଡ୍ ନାଙ୍ଗ୍ ସବେନ୍ ଇମ୍‌ତା  
 ସେକାଡ଼ାକାନ୍ ତାଇନ୍‌ପେ, ୧୬ ମେନ୍‌ଦ ଲେବେଃମନ୍‌ତେ ଆଡ଼ଃ  
 ବୁଗିନ୍ ମାଈନ୍‌ତେ କାଜିରୁହାଡ୍‌କପେ । ଆପେୟାଃ ବିବେକ୍  
 ନିରାଲ୍ ଦହେପେ, ଏନ୍ତେ ଆପେ ଯୀଶୁ ଖ୍ରୀଷ୍ଟକେ ଅତଙ୍ଗ୍ ନାଙ୍ଗ୍  
 ବୁଗିନ୍ ତାଇଲ୍ ତାଇଲ୍‌ରେ ତାଇନ୍ ଇମ୍‌ତା ଆପେୟାଃ ବିଷାଏରେ  
 ଏଡକାନ୍ କାଜି କାଜିତାନ୍‌କ ଗିହ୍ନୁଗଃଆକ ୧୭ ଏଡକାନ୍ କାମି  
 କାମିକେଦ୍ତେ ଦୁକୁ ନାମ୍‌ହେତେ, ପାର୍‌ମେଶ୍ୱାର୍‌ଆଃ ମନେଲେକା  
 ବୁଗିନ୍ କାମି କାମିକେଦ୍ତେ ଦୁକୁ ନାମେତେୟାଃ ବୁଗିନାଃ ତାନାଃ  
 । ୧୮ ଆପେକେ ପାର୍‌ମେଶ୍ୱାର୍‌ତାଃତେ ସୁତୁଃଆଡ୍‌ପେ ନାଗେନ୍ତେ  
 ଯୀଶୁ ଖ୍ରୀଷ୍ଟ ଆଇଃକ୍‌ଗି ଧାର୍‌ମାନ୍ ତାଇକେନ୍‌ରେୟ କା ଧାର୍‌ମାନ୍  
 ହଡକଆଃ ପାପ ନାଗେନ୍ତେ ମିସାଗି ଗଏଃୟାନା । ଇନିଃ ହଡମ  
 ଲେକାତେ ଗଏଃୟାନା ମେନ୍‌ଦ ଆମ୍ବା ଲେକାତେ ଜୀହୁଦ୍‌ୟାନା,  
 ୧୯ ଏନ୍ତେ ଆମ୍ବାତେ ଇନିଃ ତଲ୍‌କାନ୍ ଆମ୍ବାକତାଃ ସେନ୍‌କେଦ୍ତେ  
 ପ୍ରାଚାର୍‌କେଦା । ୨୦ ନୁହ୍ନୁ ଲାଉକା ବାଇତାନ୍ ଇମ୍‌ତା ପାର୍‌ମେଶ୍ୱାର୍  
 ଧିରାଜ୍ ସାବ୍‌କେଦ୍ତେ ତାଙ୍ଗିତାନ୍ ତାଇକେନାଏ, ଇମ୍‌ତା ଅକନ୍  
 ହଡକ ପାର୍‌ମେଶ୍ୱାର୍‌କେ କାକ ମାନାଡିଙ୍ଗ୍ ତାଇକେନା, ଇନ୍‌କୁ  
 ଏନ୍ ଆମ୍ବାକ ତାନ୍‌କ । ଏନ୍ ଦାଆଃ ଜାହାଜ୍‌ରେ ବଲକେଦ୍ତେ

\* ୩:୧୪ ୩:୧୪ ମାଥୁଉ ୫:୧୦.

କାମ୍ପତିଗି ହତ, ଚାଏ ସବେନ୍ ମେସାକେଦ୍‌ତେ ଇରାଲିୟା\* ଝାନ୍‌ଗି  
 ଚୁଡ଼ା ଦାଆଃହେତେ ବାଞ୍ଚାଅୟାନାକ । <sup>୨୧</sup> ଏନାଦ ଆପେୟାଃ  
 ଜୀଉବାଞ୍ଚାଅ ହବାଅଃତାନ୍ ବାପ୍ତିସ୍ତାରେୟାଃ ଜନ୍‌କା ତାନାଃ । ନେ  
 ବାପ୍ତିସ୍ତା ଆପେୟାଃ ହତ୍‌ମରେୟାଃ ହୁମୁ କାଏ ସାଙ୍ଗିନେଆଁ, ମେନ୍‌ଦ  
 ପାର୍‌ମେଶ୍‌ବରତାଃରେ ବୁଗିନ୍ ବିବେକ୍ ନାମେ ନାଗେନ୍ତେ ବିକ୍ତି, ଆତଃ  
 ଯୀଶୁ ଖ୍ରୀଷ୍ଟାଃ ଜୀଉବିନିରିଦ୍ ହରାତେ ଆପେୟାଃ ଜୀଉବାଞ୍ଚାଅ  
 ହବାଅଃତାନା <sup>୨୨</sup> ଏନ୍ ଯୀଶୁ ଖ୍ରୀଷ୍ଟ ସିର୍ମାତେ ରାକାବ୍‌ୟାନା ଆତଃ  
 ପାର୍‌ମେଶ୍‌ବରଆଃ ଜମ୍‌ତିସାଃରେ ଦୁବାକାନା, ଆତଃ ସିର୍ମାରେନ୍  
 ଦୁଁତକ, ଆକ୍‌ତେୟାର୍ ନାମାକାଦକ, ପେଡ଼େଃ ନାମାକାଦକ ଇନିୟାଃ  
 ଆବରରେ ମେନାକଆ ।

## ୪

### ମନ୍ ବାଦ୍‌ଲୀଅକାନ୍ ଜୀଞ୍ଜାନ୍

<sup>୧</sup> ଯୀଶୁ ଖ୍ରୀଷ୍ଟ ହତ୍‌ମରେ ଦୁକୁ ନାମାକାଦ୍ ହରାତେ, ଆପେୟ  
 ଇନିୟାଃ ଲେକାଗି ମନ୍ ବାଇକେଦ୍‌ତେ ଆପେଗି ପେଡ଼େୟେନ୍‌ପେ,  
 ତିୟାଃତି ଜେତାଏ ଖ୍ରୀଷ୍ଟାଃ ନାଗେନ୍ତେ ହତ୍‌ମରେ ଦୁକୁ ନାମାକାଦ୍‌ନିଃ  
 ପାପ୍‌ରେ ଆତଃ କାଏ ତାଇନାଃ । <sup>୨</sup> ନାହାଁଃଏତେ ଆପେୟାଃ  
 ଅତେଦିଶ୍‌ମରେ ବାଚାଅକାନ୍ ଜୀଞ୍ଜାନ୍‌କେ ହତ୍‌କଆଃ ଏଡ୍‌କାନ୍  
 ସାନାଙ୍ଗ୍ ଲେକାତେ କା ସେସେନ୍‌କେଦ୍‌ତେ ପାର୍‌ମେଶ୍‌ବରଆଃ  
 ମନେଲେକାତେ ସେସେନ୍ ଲାଗାତିଙ୍ଗ୍‌ୟାଃ । <sup>୩</sup> ସେନଃୟାନ୍  
 ଦିପିଲିକରେ ଆପେ ସାଅଁସାର୍ ହତ୍‌କଲେକା ପୁରାଃଗି ଜୀଞ୍ଜାନ୍  
 ବିତାଅକାଦାପେ । ଆପେୟାଃ ଜୀଞ୍ଜାନ୍ ଏଡ୍‌କାନ୍ ସାନାଙ୍ଗ୍,  
 ଇଲିଆର୍‌ଶ୍ ନୁଁରେ ବୁଲଃ, ରିଜ୍‌ରାଙ୍ଗ୍, ଆତଃ ମୁରୁଡ୍ ସେଞ୍ଜା  
 ତାଇକେନାପେ । <sup>୪</sup> ନାହାଁଃ ଆପେ ସାଅଁସାର୍ ହତ୍‌କ ଲେକା କା  
 ଫାର୍‌ତି କାମିରେ ରାସକାନ୍ ନାଙ୍ଗ୍ କାପେ ମେସାନତାନା, ଏନାତେ  
 ଇନ୍‌କୁ ଆକ୍‌ଦାନ୍‌ଅକେଦ୍‌ତେ ଆପେକେ ଲାନ୍‌ାପେ ତାନାକ ।  
<sup>୫</sup> ମେନ୍‌ଦ ଅକ ପାର୍‌ମେଶ୍‌ବର ଜୀନିଦ୍ ଆତଃ ଗଜାକାନ୍‌କଆଃ ବିଚାର୍  
 ରିକାଃଏ, ଇନିଃତାଃରେ ଇନ୍‌କୁକେ ହିସାବ୍ ଏମ୍ ଲାଗାତିଙ୍ଗ୍‌ୟାଃ  
 । <sup>୬</sup> ଏନାମେନ୍ତେ ଗଜାକାନ୍‌କତାଃରେ ସୁକୁକାଜି ଉଦୁବ୍‌ୟାନା,

\* ୩:୨୦ ୩:୨୦ ଆଠ

ଜେ'ଲେକାଟି ଇନକୁ ହତକଥାଃ ଲେକା ହତଫରେ ବିଚାର ହବାନ୍ୟାନରେୟ, ପାର୍ମେଶ୍ୱାର୍ଥାଃ ଲେକା ଆମ୍ଭରେ ଜୀହୁଦଃଆକ ।

**ପାର୍ମେଶ୍ୱାର୍ଥାଃ ଖୁଜିରାଃ ବୁଗିନ୍ ଭାଣ୍ଡାରି**

୭ ସବେନାଃରେୟାଃ ଚୁଣ୍ଡୁ ସେଟେରାକାନା । ଏନାମେନ୍ତେ ଆପେୟାଃ ମନ୍ ଆବରରେ ଦହକେଦ୍ତେ, ବିନ୍ତି ନାଈ ଚିର୍ଗାଲାନାନ୍ ତାଇନ୍ଦେ । ୮ ସବେନାଃଏତେ ଆଦକା ପୁରାଃତେ ଦୁପୁଲ୍ଲାଡ଼ରେ ତାଇନ୍ଦେ, ଚିୟାଃତି ଦୁଲ୍ଲାଡ଼ଦ ପୁରାଃ ପାପକଏ ଦାଲବେଆ । ୯ ବେଗାର୍ ନଗମ୍ ତଗମ୍ତେ ମିହୁଡ଼୍ ଆଡଃମିହୁଡ଼କେ ପେଡ଼ାକପେ । ୧୦ ଆପେ ସବେନ୍କ ଜେ'ଲେକା ସାୟାଦ୍ରେୟାଃ ବାରଦାନ୍ ନାମାକାଦାପେ, ଏନଲେକାଟି ପାର୍ମେଶ୍ୱାର୍ଥାଃ ସାୟାଦ୍ରେୟାଃ ବୁଗିନ୍ ଭାଣ୍ଡାରି ଲେକା ମିହୁଡ଼୍ ଆଡଃମିହୁଡ଼ରାଃ ସୁସାର୍ ରିକାଏପେ । ୧୧ ଜେତାଏ ପାରଚାର୍ ରିକାଏରେଦ, ଇନିଃ ପାର୍ମେଶ୍ୱାର୍ଥାଃ କାଜି ପାରଚାର୍ତାନ ଲେକା ପାରଚାରେକାଏ । ଜେତାଏ ସୁସାର୍ତାନରେଦ ଇନିଃ ପାର୍ମେଶ୍ୱାର୍ତାଃଏତେ ପେଡ଼େଃ ନାମାକାଦ୍ ହତଲେକା ସୁସାରେକାଏ । ଏନାତେ ଯୀଶୁ ଖ୍ରୀଷ୍ଟାଃ ହରାତେ ପାର୍ମେଶ୍ୱାର୍ଥାଃ ମାଇନାନ୍ ହବାଅଥାଃ । ଇନିୟାଃ ମାନାରାଈ ଆଡଃ ପେଡ଼େଃ ଜାନାଅ ଜାନାଅ ହବାଅଃକା । ଆମେନ୍ ।

**ଖ୍ରୀଷ୍ଟିୟାନ୍ ନାଗେନ୍ତେ ଦୁକୁ**

୧୨ ହେ ଦୁଲ୍ଲାଡ଼୍ ହାଗା ମିଗିକ, ଅକନ୍ ସେଜେଲ୍ ବିନିଡ଼ାଅରେ ଆପେ ଦୁକୁଃତାନା, ଏନା ମିଆଁଦ୍ ଆକ୍ଦାନ୍ଦାଅନ୍ କାଜି ହବାଅଃତାନା ମେନ୍ତେ ଆଲ୍ପେ ଆକ୍ତାକାଅଃଆ । ୧୩ ମେନ୍ଦ ରାସକାଅଃପେ, ଚିୟାଃତି ଆପେ ଯୀଶୁ ଖ୍ରୀଷ୍ଟାଃ ଦୁକୁରେୟାଃ ହାନାଟିଈପେ ନାମାକାଦ୍ ହରାତେ ଆୟାଃ ମାନାରାଈ ହବାଅଃ ଇମ୍ତା ଆପେ ପୁରାଃ ରାସକାରେପେ ରାସକାଅଃଆ । ୧୪ ଆପେ ଯୀଶୁ ଖ୍ରୀଷ୍ଟାଃ ନୁଡ଼ମ୍ ନାଗେନ୍ତେପେ ହିଲାଇଅଃରେଦ, ଆପେ ସୁକୁତାନ୍ଗିଆ, ଚିୟାଃତି ପାର୍ମେଶ୍ୱାର୍ଥାଃ ମାନାରାଈରେନ୍ ଆମ୍ଭା ଆପେରେ ମେନାଇୟା । ୧୫ ଏନାତେ ଆପେଏତେ ଜେତାଏ ହତ୍ ଗଗଏଃନିଃ ଚାଏ କୁମ୍ପୁଡ଼ୁ ଚାଏ ଏଡ଼କାନାଃ କାମିନିଃ ଚାଏ ଏଟାଃନିଆଃ କାମିରେ ଆଲାଆଲାନ୍ନିଃ ହବାକେଦ୍ତେ ଦୁକୁ ଆଲକାଏ ସାହାତିଈୟେକା । ୧୬ ଜେତାଏ ଖ୍ରୀଷ୍ଟିୟାନ୍ ତାନିଃ ମେନ୍ତେ ଦୁକୁ ସାହାତିଈ ତାନରେଦ

ଆଲକାଏ ଗିହୁଗଠକା, ମେନ୍ଦ ଯୀଶୁ ଖ୍ରୀଷ୍ଟଆଃ ନୁହୁମ୍ ନାମାକାଦ୍ ନାଗେନ୍ତେ ପାର୍ମେଶ୍ଵାରକେ ଧାନଧାବାଦ୍ ଏମାଲକାଏ ।

୧୭ ପାର୍ମେଶ୍ଵାରଆଃ ଅଡ଼ାଃତାଃଏତେ ଏଚେଦ୍‌କେଦ୍‌ତେ ବିଚାର୍ ଦିପିଲିରେୟାଃ ନେତା ସେଚେରାକାନା, ଆତଃ ପାହିଲା ପାର୍ମେଶ୍ଵାରଆଃ ହଡ଼କଆଃ ବିଚାର୍ ହବାଅଃଆ । ଆବୁତାଃଏତେ ଏନେଚେଦ୍ ହବାଅଃତାନ୍‌ରେଦ୍, ଅକନ୍‌କ ପାର୍ମେଶ୍ଵାରଆଃ ସୁକୁକାଜିରେ କାକ ବିଶ୍ଵାସ୍‌ତାନା, ଇନ୍‌କୁଆଃ ଚୁଣ୍ଟୁ ଦିପିଲି ଚିଲ୍‌କାଅଃଆ ? ୧୮ ଧାରାମ୍‌ପୁଅରେ ଅଲକାନା,

“ଧାର୍ମାନ୍ ହଡ଼କଆଃ ଜୀଉବାଞ୍ଚାଅ ନାମେତେୟାଃ ନିମିନ୍ କେଚେଦ୍‌ତାନ୍‌ରେଦ୍,

କା ଧାର୍ମାନ୍ ହଡ଼ ଆତଃ ପାପି ହଡ଼କଆଃ ଚିନାଃ ହବାଅଃଆ ?”

୧୯ ଏନାତେ, ଅକନ୍‌କ ପାର୍ମେଶ୍ଵାରଆଃ ମନେଲେକା ଦୁକୁ ସାହାତିଙ୍ଗ୍‌ତାନାକ, ଇନ୍‌କୁ ଆକଆଃ ଆମ୍‌କେ ଜିମାକେଦ୍‌ତେ ବୁଗିନ୍ କାମିରେ ତାଇନ୍‌କାକ । ବାବାଇନିଃ ସାର୍ତି ପାର୍ମେଶ୍ଵାର ଇନ୍‌କୁଆଃ ନାଙ୍ଗ୍ ଏମାକାଦ୍ ଆୟାଃ ବାନାର୍‌ସାକେ ପୁରାଏ ନାଗେନ୍ତେ କାଏ ରିଡ଼ିଙ୍ଗ୍‌ୟେଆ ।

### ୫

#### ପାର୍ମେଶ୍ଵାରରାଃ ମିଣ୍ଡିଗୋଟ୍

୧ ଆଇଙ୍ଗ୍ ମିହୁଡ୍ ପ୍ରାଚିନ୍ ଆଗୁଆଇ ଲେକା ଆପେୟାଃ କାଲିସିୟାରେନ୍ ପ୍ରାଚିନ୍ ଆଗୁଆଇକକେ ବିକ୍ରିତାନ୍‌ଲଃ କାଜିକତାନାଇଙ୍ଗ୍ । ଆଇଙ୍ଗ୍ ଯୀଶୁ ଖ୍ରୀଷ୍ଟଆଃ ଦୁକୁରେୟାଃ ଗାଞ୍ଜା ତାନିଙ୍ଗ୍, ଆତଃ ଇନିୟାଃ ମାନାରାଙ୍ଗ୍ ଉଦୁବଃ ଇମ୍‌ତାରେ ଆଇଙ୍ଗ୍‌ହ୍ ଏନାରେୟାଃ ହିସାଇଙ୍ଗ୍ ହବାଅଃଆ । ୨ \*ପାର୍ମେଶ୍ଵାର ଆପେକେ ଏମାକାଦ୍‌ପେ ମିଣ୍ଡିଗୋଟ୍‌କକେ ଯାତ୍‌ନାଅକପେ, କା ସାନାଙ୍ଗ୍‌ତାନ୍ ଲେକା କାହାଗି, ମେନ୍ଦ ପାର୍ମେଶ୍ଵାରଆଃ ସାନାଙ୍ଗ୍‌ଲେକା ସୁକୁ ମନ୍‌ତେ ଯାତ୍‌ନାଅକପେ । ଟାକା ପାଏସା ନାମେ ନାଗେନ୍ତେଦ୍ କାହାଗି, ମେନ୍ଦ ରାସ୍‌କା ମନ୍‌ତେ ସୁସାର୍‌କପେ । ୩ ଆପେକେ ଅକନ୍‌କଆଃ ଯାତ୍‌ନାଅ ନାଗେନ୍ତେ ଏମାକାନା, ଇନ୍‌କୁଆଃ ଚେତାନ୍‌ରେ କା ରାଇଙ୍ଗ୍‌କେଦ୍‌ତେ ଗୋଟ୍‌କଆଃ ନାମ୍‌ନା ହବାଅଃପେ

☆ ୫:୨ ୫:୨ ଯୋହାନ୍ ୨୧:୧୫-୧୭.

। ୪ ଆତ୍ମା ମାରାଜ୍ ଗୁପ୍ତିନିଃ ହିନ୍ଦୁଃ ଇମ୍ତା, ଆପେ ମାନାରାଜ୍ରେୟାଃ  
 ରୁପୁରିପେ ନାମେୟା । ଅକ୍ନାଃଚି ଚିତ୍ତଲୀଅ କା ମୁର୍ତ୍ତୀଅଥା ।

୫ ଏନ୍ଲେକାଗି, ଏ ସେପେଡେଦକ, ଆପେ ପ୍ରାଚିନ୍ଦକଆଃ  
 ଆକ୍ତେୟାରରେ ତାଇନ୍ଦେ । ଆପେ ସବେନ୍ଦକ ମିହୁଡ଼,  
 ଆତ୍ମାମିହୁଡ଼କେ ସୁସାରି ନାଗେନ୍ତେ ଲେବେଃମନ୍ ଲେକାନ୍  
 ଲିଜାଃ ତୁସିୟେନ୍ଦେ । ଚିୟାଃଚି ଧାରାମ୍ପୁଅରେ ଅଲ୍ଲାନା,  
 “ପାରମେଶ୍ଵାର ଆପାନ୍ଦକେ ମାରାଜ୍ ମେନ୍ତେ କାଜିନ୍ ହଡ଼କଆଃ  
 ସାୟାଦ୍ ହକାଏୟାଏ, ମେନ୍ଦ ଲେବେଃମନ୍ ହଡ଼କକେ ସାୟାଦ୍  
 ଏମାକଆଏ ।” ୬ ଏନାନାଗେନ୍ତେ ପାରମେଶ୍ଵାରଆଃ ପେଡେୟାନ୍  
 ତିଃଇ ଲାତାରରେ ଲେବେୟେନ୍ଦେ, ଇନିଃ ଆୟାଃ ନେତାରେ  
 ଆପେକେ ମାରାଜ୍ପେୟା । ୭ ଆପେୟାଃ ସବେନ୍ ଉଡ଼୍ଠୁରେୟାଃ  
 ବାହାରମ୍ ପାରମେଶ୍ଵାରତାଃରେ ଏମେପେ, ଚିୟାଃଚି ଇନିଃ ଆପେ  
 ନାଗେନ୍ତେ ଉଡ଼୍ଠୁତାନା ।

୮ ଆପେ ଚିର୍ଗାଲ୍ଲାନାନ୍ ଆତ୍ମା ଏୟନାକାନ୍ ତାଇନ୍ଦେ ।  
 ଆପେୟାଃ ବାଇରି, ସାଏତାନ୍, କୁଲ୍ଲା ଲେକାଏ ହୁଁକ୍‌ରାଅ ତାନା  
 । ଅକଏକେ ଜିୟନିଆ ଏନାଏ ଦାଣ୍ଡାବାଡ଼ା ତାନା । ୯ ଆପେ  
 ବିଶ୍ଵାସରେ କେଟେୟେନ୍ଦେ ଆତ୍ମା ସାଏତାନ୍କେ ହକାଇପେ,  
 ଚିୟାଃଚି ଆପେ ସାରିତାନାପେ, ନେ ଅତେଦିଶ୍ଵମରେ ଆପେୟାଃ  
 ଏଟାଃ ବିଶ୍ଵାସୀ ହାଗା ମିଶିକରେ ନେ ଲେକାନ୍ ଦୁକୁକ ହବାଅଃତାନା  
 । ୧୦ ଆତ୍ମା ଯୀଶୁ ଖ୍ରୀଷ୍ଟଲଃ ମେସାକେଦ୍‌ତେ ଆୟାଃ ଜାନାଅ  
 ଜାନାଅ ମାନାରାଜ୍ରେ ହିସାଦାର ହବାଅଃ ନାଗେନ୍ତେ ସବେନ୍  
 ସାୟାଦ୍ରେନ୍ ପାରମେଶ୍ଵାର ଆପେକେ କେଡ଼ାକାଦ୍‌ପେୟା ।  
 ଆପେୟାଃ ପାତିକାଦ୍ରେୟାଃ ଦୁକୁ ସାହାତିକ୍‌କେଦ୍ ତାୟମତେ,  
 ଇନିଃ ଆଇଃକ୍‌ଗି ଆପେକେ ପକ୍‌ତାପେୟା, ସାଲ୍‌ସାନ୍ତ୍‌ପେୟା,  
 କେଟେଦ୍‌ପେୟା, ଆତ୍ମା ବାଇରୁହାଡ଼୍‌ପେୟା । ୧୧ ଇନିୟାଃ ପେଡ଼େଃ  
 ଜାନାଅ ଜାନାଅଗି ହବାଅଃକା । ଆମେନ୍ ।

**ରୁଣ୍ଡୁ ଜୁହାର**

୧୨ ଆଇକ୍ ସିଲ୍ଲାସକେ ପାତିୟାରରେନ୍ ଖ୍ରୀଷ୍ଟ ହାଗା ଲେକାଇକ୍  
 ମାଇନିତାନା ଆତ୍ମା ଆୟାଃ ଦେକ୍‌ତେ ଆଇକ୍ ନେ ହୁତିକ୍ ଚିତାତ୍

☆ ୫:୬ ୫:୬ ମାଥ୍ ୨୩:୧୨; ଲୁକ ୧୪:୧୧; ୧୮:୧୪. ☆ ୫:୧୨ ୫:୧୨ ପ୍ରେରିଡ଼୍ ୧୫:୨୨,୪୦.

ଅଲୀକାଦାଈଁ । ଆଈଁ ପାର୍ମେଶ୍ୱାର୍ଆଃ ସାର୍ତି ସାୟାଦ୍  
 ବିଷାଏରେ ଗାଞ୍ଜା ଏମକେଦ୍ତେ ଆପେକେ ଜୀଉରେ ରାସକା  
 ଏମ୍ ନାଗେନ୍ତେଇଁ ସାନାଙ୍ଗ୍ତାନା । ଆପେ ଏନ୍ ସାୟାଦ୍ରେ  
 ତିଙ୍ଗୁକେଟେୟାକାନ୍ ତାଇନ୍ପେ ।

୧୩ ☆ପାର୍ମେଶ୍ୱାର୍ତେ ସାଲୀକାନ୍ ବାବିଲୋନ୍ରେୟାଃ କାଲିସିୟା  
 ଆଡଃ ଆଇଁୟାଃ ଧାରାମ୍ହନ୍ ମାର୍କହ୍ ଆପେକେ ଜହାର୍  
 କାଜିକୁଲକାଦା । ୧୪ ଖ୍ରୀଷ୍ଟିୟାନ୍ ଦୁଲାଡ୍ତେ ମିହୁଡ୍ ଆଡଃମିହୁଡ୍କେ  
 ପାବିତାର୍ ଜହାର୍ତେ ଜହାର୍ତେ । ଯୀଶୁ ଖ୍ରୀଷ୍ଟତାଃରେ ମେନାପେ  
 ସବେନ୍କଆଃ ଜୀଉସୁ ହବାଅଃକା ।

---

☆ ୫:୧୩ ୫:୧୩ ପ୍ରେରିଡ୍ ୧୨:୧୨,୨୫; ୧୩:୧୩; ୧୫:୩୭-୩୯; କଲସିୟ ୪:୧୦; ଫିଲମନ୍ ୧:୨୪.

**ପାରମେଶ୍ଵାରଆଃ ଜୀନିଦ୍ ବାଚାନ୍**  
**The New Testament in the Munda language of India:**  
**ପାରମେଶ୍ଵାରଆଃ ଜୀନିଦ୍ ବାଚାନ୍**

copyright © 2020 The Word for the World International

Language: ମୁଞ୍ଡା (Muṅḍa) (Munda)

Contributor: The Word for the World International

**ପାରମେଶ୍ଵାରଆଃ ଜୀନିଦ୍ ବାଚାନ୍**  
**ନାଞ୍ଚା ନିୟମ୍ , 2020**

The New Testament in Munda Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-13

---

PDF generated using Haiola and XeLaTeX on 22 Feb 2024 from source files dated 14 Apr 2023

903abb6b-97c3-582d-9df8-a6a8f2fce6d6